

摘藻堂四庫全書薈要

集部

欽定四庫全書薈要

集部

圭塘小藁卷

三五

詳校官助教臣謝登雋



欽定四庫全書會要卷一萬六千三百十三

集部

圭塘小藁卷三

元 許有壬 撰

律詩

沙湖道中

城居如坐井出郭始知春  
草色纔翻燒禽聲便可人  
遠山來邈迤羸馬去逡巡  
喚醒三年夢東華足軟塵

田家對雪

野老能留客柴門便反關落梅點衣上飛雪墮杯間地  
僻偏宜竹窓幽更對山自憐真野逸瓶罄不知還

夜至魯港

桴鼓遠銅籠前驅列炬紅星芒寒拂地江影靜浮空聽  
語漁村近連航水驛通不才慙傳食鮭菜足為供

荻港早行

水國宜秋晚羈愁感歲華清霜醉楓葉淡月隱蘆花漲  
落高低路川平遠近沙炊烟青不斷山崦有人家

夜行潤陂

蕩蕩唐虞世區區虱蟻臣  
露餐烏攫肉夜渡馬知津  
危棧依山盡微行到水頻  
風霜儘蒙犯庶用荅涓塵

神山雨

山中日日雨松竹早知秋  
清響自深夜逸人無遠愁  
窓虛聞葉落林暗見螢流  
對景因懷杜江村事事幽

登後山觀湖漲時陰雨忽霽

陰磴盤盤上枯藤得得來  
長楊半腰水老桂一身苔  
秋

氣蛩先覺風驚鶴欲回山雲自行雨休為老夫開

晚過韶州

世去重華遠名偕二石存溪寒清見底榕老亂垂根野  
色偏宜晚民居僅似村曲江人已矣楚些擬招魂

橫浦登舟

南征殊不惡樂事總相關馬上行思句舟中卧看山盡  
收烟景去滿載月明還何往不自得浩歌天地間

元統甲戌分臺上京飲馬酒而甘嘗為作詩丁丑

分省日長多暇因數土產可紀者尚多又賦九題  
并舊作為上京十詠云

馬酒

味似融甘露香疑釀醴泉新醅撞重白絕品挹清玄  
驥子饑無乳將軍醉卧毡  
桐官聞漢史鯨吸有今年

秋羊

塞上寒風起庖人急尚供戎鹽春玉碎肥羖壓花重  
肉淨燕支透膏凝琥珀濃  
年年神御殿頒餽每霑儂

黃羊

草美秋先臚沙平夜不藏解條文豹健鬻炙宰夫忙有  
肉須共世無魂亦似驢少年非好殺假爾試穿楊

黃鼠

北產推珍味南來怯陋容瓠肥宜不武人拱若為恭發  
掘憐禽獮招徠或水攻君毋急盤饌幸自不穿墉

粃麪

坡遠花全白霜輕實便黃杵頭麪退墨磴齒雪流香玉



葉翻盤薄銀絲出漏長元宵貯膏火蒸黑笑南鄉

南鄉  
蕎麥

黑甚熟則堅實若瓦  
石可代陶盞貯膏火

### 蘆菔

性質宜沙地栽培屬夏畦熟登甘似芋生薦脆如梨老  
病消凝滯奇功直品題故園長尺許青葉更堪蔬

### 白菜

土羔新且嫩筐筥薦紛披可作青菁飯仍携玉版師清  
風牙頰響真味士夫知南土稱秋末投簪要及時

沙菌

牛羊膏潤足物產借英華帳脚駢遮地

此物喜生車帳卓歇之地夏秋

則環繞其迹而出

釘頭怒戴沙齋厨供玉食毳索出羶車莫作

垂涎想家園有莫邪

地椒

凍雨催花紫輕風散野香刺沙尖葉細敷地亂條長楚  
客收成裏奚童擷滿筐行厨供草具調鼎爾非良

韭花

西風吹野韭花發滿沙陀  
氣校葷蔬媚功於肉食多  
濃香跨薑桂餘味及瓜茄  
我欲收其實歸山種澗阿

尋梅

何以慰吾衰梅花秀發時  
晚香傳遠樹春雪避南枝  
林靜來差早溪深行獨遲  
與君謀一醉及此未離披

水木清華亭宴集十四韻并序

水木清華亭侍御史王公公儼別墅也位都城巽隅出  
文明門餘里許園池構築甲諸邸第予客京有年識公

儼亦久而未嘗迹其地至正乙未春自汴召入俄公儼  
由遼省拜中臺握手傾倒屢約宴集塵冗不果致期宿  
具復有意外之撓乃七月二十又三日始遂盍簪左轄  
呂仲實中執法杜德常右司王本中左司尚彥文實同  
尊俎酒旨樂備物腴意勤適雨霽秋清塵空地迥庭木  
湧翠渚蓮散紅北瞻闔閣五雲杳靄極目西望舳舻汎  
汎於烟波浩渺雲樹參差之間蕭然有江鄉之趣不知  
其為輟擊肩摩之境也煩襟滯慮滌濯淨盡茲游竒絕

宜造物之不輕畀也公儼請曰人生四美百年幾遇不可不紀也乃即水木清華亭為韻賦詩有士分華字其詩曰

世祿推門閥天墀幾拜嘉高情忘勢利大隱謝紛譁朝市塵無染蓬瀛路豈賒眷言營別墅初不遠東華畫舸堂前過青帘柳外斜晴紅迷菡萏寒翠接蒹葭揮塵風生座扶筇雨壓沙萍開輕泛鴨荷側重擊蛙只訝神仙府誰知宰相家賓朋玄圃玉文采赤城霞麗曲凝雲表

鮮粧炫水涯添栽三徑竹遮賞四時花心事尊中物人  
生海上槎相逢須盡興明日各趨衙

送馬明初教授南歸二十韻并序

後至元戊寅予得請歸江夏別業明年冬遊長沙又明  
年二月安仁馬君明初來見於琅璚山其人溫醇其文  
粹精傾蓋如平生同遊南嶽更唱迭和遂同歸江夏甫  
七日復叅知政事命下以小兒累之又同北馬至任城  
明初舟覆幾不免間闕跋涉不忍予棄用中臺翰林薦

堂除維山書院山長及格擢右衛率府教授始釋褐衛

官若胥卒皆國人明初請收書教其子弟為華學官屬  
黷之鳩俸檄明初買書江南因得歸省其家焉過予相  
下將別請言吁世俗之交翻覆雲雨況延之館塾者其  
為交不又密乎饗飧之不精不時也供侍之不慎不及  
也脯脩之不腆也汲引之不酬也為主入者有能不犯  
於是者乎人情久則狎狎則慢慢則隙生焉賓主至是  
不失歡者鮮矣而明初與予十年如一日始終無間言

有德君子哉述其槩為詩以餞之其詩曰

吾子昔傾蓋琅璆古渡頭袖文驚蜀錦懷寶重天球心  
既同金斷膠因向漆投有邀須共往無倡不為酬南嶽  
朝聯轡湘江暮艤舟履窮峰頂寺詩滿水邊樓訪古由  
來喜尋芳到處留遂移衡浦隱便作武昌遊坐席何曾  
暖招旌遽見求高情安旅次遐躅又神州道路多嘗險  
山川只薦愁掃雲髡兔頽鑒雪髻貂裘善誘兒何幸深  
藏價未收忽看鴻鵠舉甘效蜃蛭休洹水寒偏瑩林慮



晚更幽誰知三仕已相累十春秋公道先揚善真才自  
拔尤恩袍明翡翠教鐸振貔貅行役仍清淡言歸貌阻  
脩臨歧惟一語音信莫悠悠

壽李秋谷平章

黃鍾噓喚挽春留綠蟻浮香帶月筭宰相得閒纔是貴  
人生有子更何求家傳文字五千卷身在神仙十二樓  
記取年年好風景雪松霜檜豈容秋

送黃文復歸長沙

半生湖海夢依稀但誦湘南遠寄詩先友凋殘公獨健  
故園荒盡我方歸百手未滿常憂畏千里相逢又別離  
他日瓊江松下路西州難似此沾衣

橫山有高竹樓別業留信宿始歸

酒香牲腍主人歸正是猿驚鶴怨時梅影小池春入畫  
竹聲虛閣夜催詩世間真樂無多事身外浮名只費辭  
他日結茆容我隱一章先當買山貲

九日陪闔臺諸公登石頭城

一江環抱四山圍  
酬節追歡剩費詩  
鴈影不移雲盡處  
秋光都在雨晴時  
當年玉樹人何在  
明日黃花蝶豈知  
便駐高軒拚醉倒  
絕勝無酒繞東籬

題昌平劉諫議祠

一卷春秋兩鬢皤  
丹誠貫日口懸河  
策能匡世時不用  
天實厭唐人柰何  
自古大材多薄命  
而今我輩亦登科  
可憐熏腐俱塵土  
得似高名永不磨

遊昌平憇縣學歸過朱都督碑

木葉才霜水不波  
偷閒今日遂婆娑  
清秋林壑斜陽好  
豐歲郊原樂事多  
秦塞已隳仍郡縣  
武城雖小有絃歌  
却憐一片朱家石  
千古涇原臭不磨

神山即事

京塵汨沒已華顛  
恰是山居第一年  
松月照窓詩入聖  
竹風吹榻夢遊仙  
隨人久作悠悠者  
處世方知綽綽然  
尚愧未能忘口腹  
時勞昆季致肥鮮

和謝敬德學士見寄韻

二首

平生踈懶是天姿  
今歲春來起亦遲  
好酒或如陶靖節  
杜門深愧鄭當時  
向來事業惟供笑  
如此風光忍廢詩  
館閣真才試枚舉  
鵲山陪預恐難期

淡靄輕風弄野姿  
江天寥廓鳥飛遲  
從知宇宙多閒地  
誰信襟懷勝舊時  
夜雨不驚逋客夢  
暮雲猶入故人詩  
山中亦有陽春曲  
拂拭朱絃待子期

登岳陽樓

半空輪奐壯巴丘  
消得騷人一繫舟  
雲氣遠携湘雨至

湖光寒入蜀江流山川信美非吾土天地無窮有此樓  
三十四年如夢過可憐華髮賦重遊

黃陵廟

黃陵廟下草萋萋水遠山長聽竹枝末路不求同死處  
重華寧有再來時霜筠苦淚留千古桮樹愁雲接九疑  
珍重韓公修廢墜却憐微福類神私

過湘潭

江邊楊柳翠縈回柳外人家晷晷開一夜東風花落盡

千年華表鶴歸來暮雲山出遠浮黛春雨水添濃潑醅  
莫艤扁舟訪陳迹白頭懷抱易生哀

祝融峯與廷鎮觴詠有懷歐陽原功蓋嘗約同  
遊而予不能待其歸也

載酒窮躋最上峯嘯歌聲撼海濤風得陪五馬二千石  
獨少三生六一翁為問北門紅日下何如南嶽白雲中  
寄詩幾欲申前約無奈人生似燕鴻

時雨忽降簿書甚稀獨坐王可矩右司有詩次

其韻

翠樾雲深百鳥鳴  
彤闈如水嫩涼生  
雨聲自與詩有約  
天巧豈容人強名  
萬里秋風黃鵠夢  
五湖春水白鷗盟  
年來不用愁華髮  
尚有觀山老眼明

西廳東閣總詩鳴  
天籟相關觸處生  
京國故人多老病  
洛陽才子獨聲名  
風雲幸際文昌運  
松柏休忘歲晚盟  
他日江湖携手去  
儘渠蚊睫有焦明

題武衛段指揮書林



相府深沉書若林牙籤插架列森森千枝萬葉本根在  
二帝三王雨露深樛翳斯文功利學棟梁來世聖賢心  
經殘百氏紛紛出慎勿輕栖惡木陰

閒居雜詩

四首

鬢髮蒼浪齒動搖自知宜退待誰招茶餘引鶴消春晝  
酒醒聞鷄記早朝肥截玉肪羹縮項香翻雲子飯長腰  
尚嫌門有徵詩客時與山人破寂寥

半山雲樹接脩簞鎮日無塵到草堂  
瓦牖風來書葉亂

膽瓶花落硯池香  
壺觴自酌教微醉  
松菊猶存及未荒  
護果灌園常不暇  
誰知閒裏更多忙

鵲山東北接郊墟  
郭影嵐光畫不如  
九十日春朝暮雨  
兩三間屋古今書  
庭花紅礙經行處  
園竹青回剪伐餘  
滿地蒼苔愁踏破  
年來深喜故人踈

竊祿多慙號具臣  
歸田何幸作閒人  
登山臨水今非客  
病酒愁花又過春  
夢斷紫霄黃閣遠  
眼明青鏡白頭新  
芥臺竹笋來相續  
不道茅柴味更真

和傅汝礪寄來韻

二首

江水舟航日夜東故人音問得常通  
君才能挽千鈞重我老惟懷一畝宮  
自古山林容小隱只今臺省有諸公  
欲知別後詩成處都在花香竹影中

春紅園圃眩西東花下縈紆一逕通  
不向雷門操布鼓要從人海見珠宮  
多言浪負三千牘老夢都忘十八公  
珍重吾宗有成訓人間何似在山中

主塘小蒙卷三

欽定四庫全書薈要卷一萬六千三百十四

集部

圭塘小藁卷四

元 許有壬 撰

絕句

題西域木唐卿旌表孝義卷

橋梓天殊棟有華  
良心初不間幽遐  
何年四海無旌表  
盡化忠臣孝子家

琳宮調次安南王韻

二首

涼入簾幃夜色輕  
瑤臺添月更虛明  
一壺天地渾無迹  
只有清風動竹聲

山中活計只餐霞  
世事茫茫日自斜  
謫到玉堂無好況  
夜深猶草侍中麻

織錦迴文圖

明珠金縷爛縈回  
香玉連環剪不開  
不把肺肝都織出  
將軍惟識趙陽臺

杜子美象

刪後騷餘代有聞集成惟許杜陵人憑誰寄語汭流者  
流到江西不是春

賞心亭

賞心亭上雙柏樹看我往來今十年柏樹青青宛如昔  
當時游子已華顛

牛背觀書圖

蒲羈盤膝勝安輿人訝形骸與世疎却笑徙居三十乘  
恰如牛背一編書

畫馬

惆悵孫陽世久無紛紛駑驥遂齊驅不教神物俱湮滅  
猶幸人間有畫圖

丙吉問牛圖

肥充列鼎健充車厚養專為簿領毆千古清風梓人傳  
憑誰書繼丙家圖

和喀爾子山韻

洞深春早透蘭芽窓曉雲香亂海霞萬丈紅塵飛不到



紫簫吹綻碧桃花

李陵臺

李陵臺下駐分臺  
紅藥金蓮徧地開  
斜日一鞭三十里  
北山飛雨逐人來

上都歸口號

嬌兒幼女逐山妻  
爭解行囊看賜衣  
顛倒海圖碑短褐

可憐壯士北征歸

信筆

造物知余素愛山一官故調萬山間山深民朴官無事  
却為觀山日不閒

冬夜即事

紙窗鋪月白溶溶爐火欺燈照室紅萬籟聲沉人語定  
好詩都在杳冥中

行縣書所見

漲潦留泥糞稻畦石渠分水灌麻池醉翁社散忘歸路  
行過柴門尚不知

謝祐之桃花折枝

天台不折一枝歸  
晴日明窓有所思  
流水亂山迷去路  
按圖無語立多時

令狐學士金蓮圖

九天光彩動金閨  
輦路風香樹影齊  
却笑漢家恩數薄  
只教天祿待青藜

神山集詩二首

山留殘雨濕拖雲  
竹引鮮飈細灑人  
詩思清如寒水玉

休教落紙恐沾塵

窓扉九夏鎮長開一榻無塵地有苔  
恠底山禽栖不穩竹林風雨送涼來

次黎東山鳳栖別墅韻

風漪翠舞躬耕稻雲錦紅酣手種花  
杖策尋君迷不得有書聲處是君家

七里原頭營別業三間堂下有東籬  
霜林不盡天如洗都是山人未了詩

都門柳

都門四十里青青幾度迎人幾送行老子有言來汝柳  
只煩相送莫相迎

書所見 二首

陵坡野菜綠如鋪膚受方期宥老榆菜少人多挑掘盡  
有榆從此盡無膚

田園賣盡及兒孫少壯流移老病存一段升平好圖畫  
人間惟欠鄭監門

夜次館陶

二首

三老趨程不憚勞  
船頭坐看月輪高  
烟村漁火微茫外  
一簇人家是館陶

浦雲林霧鬱蒼蒼  
水面無風晚自涼  
今夜蓬窓應不寐  
計程三百是吾鄉

林慮南樓

西山為我曉烟開  
正爾癡鍾造物哀  
更欲細看陰霧處  
老龍將雨出山來

題龍遜甫耕雲堂

蒲山深鎖白英英，不解為霖但可耕。  
只恐無心忽飛去，楚人何處望秋成。

董仲達送予至湘陰別後順風比晚行三百里  
悵然有懷作二絕付其僕之遠送者持歸

吾子才華我最知，鬢毛回首各成絲。  
汨羅江上一杯酒，萍水相逢又幾時。

江蘼杜若滿汀洲，騷國春來亦可愁。  
一日順風三百里，

故人何處望予舟

即事 二首

幾家門繫釣魚船  
一陣風香燎麥烟  
畫出太平村落景  
酒旗多在綠楊邊

遠浦客帆明冉冉  
前村牧笛響嗚嗚  
園桑葉盡蚕成繭  
庭樹陰濃燕引雛

春日漫述

竹几蒲團嬾最宜  
不知花影隔窗移  
鄰翁忽報小甕熟



老子坐忘成坐馳

卧龍圖

能辨人間大有年  
九淵誰遣抱珠眠  
等閒莫似隆中起  
雨得西南最爾天

蘇彥良西塾堂

蒼苔滿逕樹連村  
中有幽人屐齒痕  
此去客來宜定約  
無詩無酒不開門

圭塘小景卷四

欽定四庫全書薈要卷一萬六千三百十五

集部

圭塘小藁卷五

元 許有壬 撰

序

文丞相傳序

宋養士三百年得人之盛軼唐漢而過之遠矣盛時忠  
賢雜還人有餘力及天命已去人心已離有挺然獨出  
於百萬億生民之上而欲舉其已墜續其已絕使一時

天下之人後乎百世之下洞知君臣大義之不可廢人心天理之未嘗泯其有功於名教為何如哉丞相文公少年趕厲有經濟之志中為賈沮徊翔外僚其以兵入援也大事去矣其付以鈞軸也降表具矣其往而議和也冀萬一有濟耳平生定力萬變不渝父母有疾雖不可為無不用藥之理公之語公之心也是以當死不死可為即為逸於淮振於海真不可為矣則惟有死爾可死矣而又不死非有他也等一死爾昔則在己今則在

天一旦就義視如歸焉光明俊偉俯視一世顧膚敏裸將之士不知為何物也推此志也雖與嵩華爭高可也宋之亡守節不屈者有之而未有有為若公者事固不可以成敗論也然則收宋三百年養士之功者公一人爾孫富為湖廣省檢校官始出遼陽儒學副提舉廬陵劉岳申所為傳將刻之梓俾有壬序之有壬早讀吟嘯集指南錄見公自述甚明三十年前遊京師故老能言公者尚多而訝其傳之未見於世也伏讀感慨惜京師

故老之不及見也公之事業在天地間炳如日星自不容泯而史之取信世之取法則有待於是焉若富也可謂能後者已

五峯文集序

五峯胡先生文集凡五卷南軒張先生序之矣益陽劉用孚將刻諸家塾且徵予題其端予惟世之深知者莫若師友先生之集南軒之序詳矣予何人哉然其引而不發者愚不容訕也先生資質純粹根乎天性講貫精

密得之家傳於六經則沉潛反覆取道之原於百家叅  
考互訂必是之歸其涵養見於知言一書而性命道德  
之微無不貫其設施著於皇王大紀而禮樂刑政之用  
無不該議論慷慨輝光宣著千載之下猶想見其風采  
至於發言為詩抒言為文皆修齊治平之實也先生避  
地衡山結廬五峯故嘗造祝融之峯以求先生之遺蹟  
而深山大谷雲烟草樹邈乎其不可求也獨取先生之  
書伏而讀之其亦萬一私淑者乎用孚刻其書俾大行

諸世其用心亦仁矣哉

大一統志序

至元二十三年歲丙戌江南平而四海一者十年矣集  
賢大學士中奉大夫行秘書監事札瑪拉迪音言今尺  
地一民盡入版籍宜為書以明一統世皇嘉納命札瑪拉  
迪音奉直大夫秘書少監虞應龍等蒐輯為志二十八  
年辛卯書成凡七百五十五卷名大一統志藏之祕府  
應龍謂比前代地理書似為詳備然得失是非安敢自



斷尚欲網羅遺逸證其同異焉至正六年歲又丙戌十二月二十一日中書右丞巴爾奇爾布哈率省臣奏是書國用尤切恐久湮失請刻印以永於世制可明年丁亥二月十七日皇上御興聖便殿中書平章政事特穆爾達實傳旨命臣有壬序其首臣聞春秋所以大一統者六合同風九州共貫也然三代而下統之一者可考焉漢拓地雖遠而攻取有正譎叛服有通塞況師異道人異論百家殊方指意不同亡以持一統議者病之唐

腹心地為異域而不能一者動數十年若夫宋之畫於  
白溝金之局於中土又無以議為也我元四極之遠載  
籍之所未聞振古之所未屬者莫不渙其群而混於一  
則是古之一統皆名浮於實而我實協於名矣且統之  
為言昉見於易乾之彖曰大哉乾元萬物資始乃統天  
說者謂天也者形也統也者用形者也象曰天行健君  
子以自強不息則又示人以體乾之道蓋天為萬物之  
祖君為萬邦之宗乾以至健而為萬物始乃能統理於

天皇上體乾行健以統理萬邦所謂一統萬類可以執一御而六合同風九州共貫之機括繫焉九州之志謂之九丘周官小史掌邦國之志外史掌四方之志志之由來尚矣況一統之盛跨軼漢唐者乎是書之行非以資口耳博洽也垂之萬世知祖宗創業之艱難播之臣庶知生長一統之世邦有道穀各盡其職於變時雍各盡其力上下相維以持一統我國家無疆之休豈特萬世而已哉統天而與天悠久矣

綱目書法序

朱子感興詩躡舉三朝而不它及其有激於歐馬而綱目之所以作也周不綱非一日至命三家為諸侯則其網不復可振矣此三家託始之命意也晉史帝魏習鑿齒已病之唐書紀武則范氏之論至矣通鑑千三百六十二年事如指諸掌偉哉書乎其文則猶史也朱子慨然本春秋之旨任筆削之重主正統以明君臣之分嚴書法以誅亂賊之心其取義大矣永新劉益友先生作

書法發明之其徒進士湖廣省照磨馮君敬脩欲其說  
裨於世俾抒其槩噫朱子之心憂世甚至非矛盾溫公  
者也民彛物則之所係則因草生焉諸侯僭王則貶稱  
君無正統則並書不相下帝昭烈以明正統書在房陵  
以合乾侯死揚雄之仕莽卒陶潛而係晉皆凜乎斧鉞  
其筆而君臣之大義明矣它如奧義微旨益友之撤覆  
發韞殆無餘焉若夫開卷之初命三家率舊文者終卷  
非一義苟至當吾何異焉蓋綱目成讀通鑑者有所折

衷而亂臣賊子無所逃罪矣二書可相有而不可相無者也益友之書適而不牽會而不撓智周於理而力周於文矣或謂孔子作春秋三傳且相異同朱子學孔子者益友書法果盡合朱子之心乎予曰朱子之書主褒貶其心易知也昔之書今之削昔之遺今之特書揆之以始末律之以凡例舉此以見彼寓微而示顯者益友之綜覈精矣竊嘗一二致疑沉潛反覆祇見目力心思之不逮而足之所未至固未易悉其地之所有也然則

書法一書抑綱目之不可無者乎後之人有如左氏公穀者操戈而出則非區區之所及知也

秋谷文集序

相國李韓公秋谷先生薨之二十七年子獻由參議中書省事拜治書侍御史進侍御史有壬寅中丞一日出先生文集俾序其端昔蘇子瞻恨不及一見范文正公與其季子德孺同官於徐序文正遺藁以挂名文字中自托門下士之末為幸而有壬之擢第也先生寔座主

接餘光親誨益不少視子瞻之於范文正則有壬之幸

多矣序其敢辭先生以雄邃之學為帝者師功勲在王  
室聲名滿天下自九重以至於里巷皆以字稱才氣跌  
宕落筆縱橫歌詩流播荒陬下邑傳郵逆旅往往大書  
於壁然世之歌詩而不知其文知其文而墓碑未出不  
知其功勲之大之詳也國初因仍吏治日就媮窳士氣  
奄奄僅屬先生在潛邸日久啟沃謂儒可與守成一旦  
當國即行貢舉蓋倡於草昧條於至元議於大德沮尼



百端而始成於延祐亦憂憂乎其艱哉三十年來得人  
之列於庶位者可枚指也士風之隆替治化之樞紐在  
焉大德之末丁國勢危疑神器杌隍之會猶操舟灩澦  
三峽遇排山倒海之風而能力贊秘策卒底平濟非社  
稷之臣乎若夫名爵掃地而削其尤錫予空帑而復其  
舊太官恃不鉤檢而覈其濫宿衛依憑城社而沃其穴  
貴近世臣莫敢議及乃挺身任之灼知將來之危不恤  
也國家用儒者為政至元而後炳炳有立者先生一人

而已有壬因襮其槩使讀是集者知有德有言且以見  
功勲之出有原抵也皇上追念勲德贈舊學同德翊戴  
輔治功臣太保儀同三司上柱國追封魏國公謚文忠  
獻字伯徵世濟其美詎可量也哉

特進大宗師閑閑吳公挽詩序

至正六年十月七日特進上卿玄教大宗師閑閑吳公  
薨於大都崇真萬壽宮承慶堂中朝士駢沓走弔莫不  
哀傷士哀傷之不足又形諸歌辭諸弟子哀為卷軸徵

序其首以倡嗣音以廣其哀焉有壬交游三十年昔在  
政府嘗奉勅贊公像有人以為仙我以為儒之語士論  
不謂過也得請歸公遺雲林小影曰我不能去以我像  
行是從公于邁也今年四月赴翰林學士召甫入京公  
即率其徒治具相勞旅館中既陞見將歸造承慶堂不  
告以故但酒至為引滿公曰快意若是豈欲去而留別  
耶有壬明日遂行閏十月再赴承旨召至京則公已殯  
於嶽祠之光岳堂矣嗚呼惜哉公年十三學道十六已

拔萃班行其師神德真君受世皇殊眷江南初定有事  
南嶽公以大弟子選行神德代祠嶽瀆公實輔行年二  
十三聲望赫赫矣始授冲素崇道法師南嶽提點加號  
玄德改大都崇真萬壽宮提點拜玄教嗣師總攝江淮  
荆襄等處道教都提點神德觀化制拜公特進上卿崇  
真弘道玄德廣化真人總攝江淮荆襄等處道教知集  
賢院道教事玄教大宗師皇帝即位親御翰墨書閑閑看  
雲四大字以賜年益高體日健勝目障而復明恭迓龍

虎臺歸歷造故舊戒其徒番次肆設飲必盡歡坐是得  
疾越八日中夜命弟子焚香中庭更衣正寢端然而逝  
壽七十有八平生勇於為善不以方外自疑故凡政令  
之得失人才之當否生民之利病陰有以裨益於時者  
人不知也與人交終始不渝至其子孫猶周恤之平居  
宴坐叩以國初事歷歷覩縷世家源派隆替顛末按譜  
敷陳有不及者經久覆叩一語不爽二親之存屢歸為  
壽其沒也得請襄事以能喪聞疏封贈謚備極恩榮夫

神仙之事不得而知吾儒闢之以其亂大倫也若公事君而忠事親而孝謂之亂倫可乎壽躋八旬脩然而返冥漠與造物者為徒視無益於世白日輕舉而稱神仙者世未必有能知其孰是孰非者已其生質之異際遇之隆言之實則有待講虞公集行述方將銘堅珉登太史何事於序諸弟子奉冠劍歸葬有日請益切故為述三十年之契以寫不能自己之情而與其出處之槩以導締誼斥苦之和者焉

張文忠公年譜序

贈平章政事濱國文忠張公薨南臺中丞張起巖銘其  
碑翰林學士歐陽玄序其文江浙儒學提舉黃潛記其  
祠三君洎有壬皆延祐乙卯公主文所取進士也有壬  
辱知尤深公之薨乃不獲致一奠之哀獨欲效片言隻  
字以荅知遇而奔走睽阻又不獲陪三君之列竊有憾  
焉公之子秘書郎引奉公年譜俾序其端嗚呼此有壬  
之志也公文行履歷具諸碑而槩諸譜矣請以躬承一

二言之公汲引後進如不及有壬初倅遼州偶免瘵曠  
書來獎勉有興斯文復古治語承乏中朝公在鄉里每  
小有著作達左右必喜而形之書蓋欲策其未至也尤  
慎許可獨稱維山陳公曰邇來士大夫宜亟法此老蓋  
取其立朝蹇諤進退明決有契於心以矯時弊也朋游  
有為御史過於自保者公曰御史士大夫之洛陽也此  
而無聞無官可為矣拜詹事丞有壬迂之通州坐漕廳  
語終日其略曰予見舉人以書攫官旋擲其書以官裕



身而尋敗其官多矣子將不釋於用其勉之翼日入城  
則飄然歸矣自是不復一接焉公以布衣入京歷登樞  
要道不合即去優游山水若將終身闕中之饑人死殆  
盡而臺中丞之命一下慨然登車傾已財竭心思活垂  
死無筭號慟感疾以薨發於至誠有不能自己者非勉  
強所能也或議其蒞事太迫而疑其制行過高不知義  
之所在皆當為者也國家百年培養士類其學固足以  
支梧世用至於養其氣以勵其風節則若有未至者焉

風節不勵而不殉於富貴者鮮矣惟豪傑之士挺然有見於世而頑廉懦立之機係焉若公可謂豪傑之士矣而其久退一出又有合於義之大者也於虜其可尚也哉

忍經序

衡陽高士栖碧羅巨海嘗從文山海上歸終身宋衣冠交接稱許尤不苟有壬讀書衡泮居與之隣乃辱與進聞其稱海北道廉訪使榕寓孫公之賢不容口盖公往來

過衡衡士大夫多慕而見之巨海則交處最密者有送  
行序若詩在栖碧文集今尚能記其槩公金源烏古部  
人征宋有功歷官所至皆有惠政長憲海北民懷吏畏  
太夫人年高上疏歸養沂泐湖湘士大夫無不熟公者  
今中書左丞大司農良楨榦卿其子也時望所屬公累  
贈推忠靖遠著節功臣榮祿大夫中書平章政事柱國  
追封魏國正憲公某不及拜下風猶欲識其子孫以酬  
平日景行先哲之意而榦卿仕早有聲日踐華要承乏

政府實嘗同寅都城僦屋又得為鄰一日出書曰忍經以示某曰先子平生有得於此輯而為書子其序之某識翰卿但知其世有積德而不知其所得之源也及讀是書為之三歎曰孫氏子孫之賢閥閱之大豈徒然哉公之言忍有正義有變義有衍義使人人有見乎此則修身齊家涖官之道盡在是矣夫以刃加心上而能受之非易事也易之懲忿窒慾書之以禮制心乃其下手要法公皆舉以示人自傳記子史以至佛書道書百家

雜著詩賦凡有關於忍經者靡不收入古今之言忍者  
無以復加矣榦卿既叅大政尋拜左丞分省外藩復入  
政府廟堂以其久勞機務聽辭中書俾專明農士論猶  
未釋也讀父之書得效若此不惟一身一家又將傳之  
天下後世也某賦性褊躁仕途五十年濱於危殆者屢  
矣使早得伏讀此書庶不至若是之殆也雖然衛武公  
年九十有五尚求箴警於國某雖七十有一苟未死一  
日有一日之事此書尚有資焉

國朝名臣事畧序

聖元基朔方立人極世祖皇帝混破裂而一之廣輪疆  
理古職方所未半其天地之再初乎渾淪所鍾命世卓  
絕之才實輩出輔成之故盛德大業之所著自顓穹生  
民未之有也然而百餘年來元勲偉績世未盡白故老  
知者湮沒無幾家乘志銘不能家至而徧知也仁皇御  
極勅太史傳功臣而玉堂秘奧世莫得而見焉監察御  
史趙郡蘇天爵伯脩輯國朝名臣事畧十五卷湖北憲

刻諸梓徵敘其端某在京師早知伯脩之才而未知其  
有是編也惟其培學上庠歷史屬久故考之也詳擇之  
也審其類例倣朱子言行錄條有徵據畧而悉豐而核  
其四方之爭先快覩者乎竊惟國朝真才雲集是編才  
四十七人有齊民知名而未錄者蓋朱子例嗣有所得  
當續書之也若是則四方之快覩者不一伯脩之學其  
益昌矣又不知今士大夫用心如伯脩者幾人世所望  
於太史氏出於事畧之外者其將有所屬乎憲長篤禮

質班幕府學殺王大有職風紀育人材俾觀者率作是亦韓子所謂牽聯得書者也

宋誠夫文集序

延祐己未贈翰林直學士謚正獻宋公誠夫偕其弟顯夫始入京過予陋巷一見如平生所著曰千樹栗者視予曰京師吾鄉田廬盡廢江湖二十年儲蓄歸為恒產獨此爾閱其帙知其學已充文已成謂之曰君之產不但與千戶侯等將與萬戶侯等承乏山北幕歲辛酉當大



此時語同官第一人必在誠夫已而果然為御史為左  
司都事皆與予同事當大廷論議不顧忌絕去儒生拘  
迂懦訥氣習若老於吏牘者仕至國子祭酒而病尋卒  
於位既葬顯夫出所為詩文監察御史上之臺臺檄山  
南憲下所部刻之梓而俾予序其端夫士之生世生有  
聞於時沒有垂於後是不死矣而士之垂世者未可必  
其必傳而不與草木俱腐也至於誠夫之文則吾知其  
必傳焉待罪中書每館閣掄材未嘗不為誠夫歔歔使

天昌以年則其長翰林集賢亦猶昔之意其魁天下也  
不幸用之未能盡其才而幸得顯夫為之弟使其文著  
於世傳於後又彙所刪文若樂府為別集片言隻字無  
所遺逸顯夫可謂能弟誠夫可謂不死矣誠夫自選其  
文更千樹栗曰至治集其傳不待予敘也獨列其守官  
梗槩使讀其文者知其政事之長而信其見之文者非  
空言也顯夫今監察御史文如其兄二宋之名於是益  
著矣

春秋集義序

春秋由三傳而下世之存者可考也范氏探經而為集  
解啖趙考三家短長為統例伊川以傳考經之事跡以  
經別傳之真偽皆號精當而世之讀者無幾及胡氏傳  
出學者翕然宗之聖朝設科遂與三傳並用諸家之說  
幾無聞焉向會試以五經發策至有不知名家名氏者  
況有考其短長而折衷為書者乎且聖人之意當時門  
人有所不知世傳左氏時代不一要非親受於聖人者

宜其辭勝而失誣也公羊穀梁傳聞逾遠諸家之說各尊所聞其能盡合聖人之意乎朱子謂春秋大旨誅亂臣討賊子內中國外夷狄貴王賤伯而已未必如先儒所言字字有義也如此則傳註之說可泥於一偏乎豫章張君立擇諸家之論或全或畧疏於三傳胡氏之後名曰集義擷衆長萃於一歷歷精至觀其自序蓋欲學者因是以求諸家之全戒其厭煩務簡而取足於此則君立所得與夫所以教人者可見矣欲觀君立之集義

當先觀君立之自序徧取諸家優游涵泳交暢旁通一  
旦有得自知去取迴觀集義心目瞭然與聞人之說襲  
而取之者異矣康節云春秋盡性之書也傳註而已乎

### 春秋經說序

予授劾歸田里客傳至御史張君約中章疏言三大逆  
當門誅洎諸姦惡族黨宜鏤削投諸遠且言天怒人怨  
驗古質今紀綱賞罰治亂所係言極剴切予讀而壯之  
億其人必知春秋者也春秋明天理正人倫語其大則

為亂臣賊子而作也約中元統癸酉進士治劇縣有聲  
入荐華貫難進易退歸卧林慮擢開州尹迫命輿疾而  
赴予熟其賢未知其蘊既觀論列且寄所輯春秋經說  
徵序於是知其深於春秋而復自喜昔者億之之中也  
董氏言為人臣者不可不知春秋然春秋豈易言哉三  
傳而下便到啖趙啖趙而下不知幾家胡氏之專精而  
改元即仁之說不能免龜山支離之議賈霜不殺之記  
不能辨法家假託之文則窮是經者亦憂憂乎其難哉

朱子不能自信於心未嘗敢措一辭者豈以是邪然其  
言曰春秋太旨誅亂臣討賊子貴王賤伯而已未必如  
先儒所言字字有義又曰聖經本平易後儒以已見論  
經故經義不白而反艱險即是究之朱子於經不既淵  
矣乎尹和靖言王安石廢春秋非其意以三傳不足信其  
不解者以其難也以其難而不解可也以其難而廢之  
則王氏心術可見我朝草廬吳公采摭諸家之言各麗  
於經分所異合所同為纂言十二卷又倣陸氏纂例為

總例七篇有功於經者也約中因纂言錄其說以附於經其自得者又疏其說於先儒之後中大路而不岐沂正流而不沱又有功於吳公者也有功於吳公斯有功於經矣一旦大用持是說以裁割庶事有什伯章疏者已經說豈空言而已哉

琴泉先生詩序

漢陽文學掾湘瀏劉謙光遠氣豪而溫學充而貞與之游知若人游之久知若翁翁字山甫蓋今之隱君子也



昔長沙趙公平遠典刑一時尤相厚善家貧有襟量士大夫過者無不款接藏書教子掃絕塵俗惟癖於琴平遠號之為琴泉先生其有得於琴乎古者成人以樂養其情性而蕩其邪穢今則無矣鄭衛嘈襍萬耳一聲聲之平者獨琴近之故嵇康嘗謂衆樂之中琴德最優幽人高士養心理性舉有託焉平遠多藝尤精於是度曲審材斲削漆絲悉身為之顧挈是號而被之則其能可知已天下之水泉為勝水之原也海雖大受外所需非

其自出也今夫發而涓涓流而滔滔微而為溝池渚而為江湖以輸於海而無窮皆吾之所自出取於內而不求於外者也而其為水也猶雨之始隕自天潔而不汚者也易象蒙中庸時出孟子之有本皆有所取琴則何取焉豈以其始達也歷澗谷觸崖石淙然鏘然幽響振越和之以清風亂之以松聲山空閒聞其有契於吾琴乎抑絲木為聲假於人以發者也泉自然者也愛而不可挈也寓諸器而寫之泠然流出於絃徽間彼有無窮之

流此有無窮之聲聲與心會物我兩忘不知琴之為泉  
乎泉之為琴乎山甫之為琴泉乎琴泉之為山甫乎吾  
聞其人淡無所好豈屑屑於藝者寓意自適以發其胸  
中之樂爾年今七十二飲食起居如少壯時其又有得  
於琴之外者乎予以平遠之交知其友之端以光遠之  
子知其父之賢故喜為序之

智子元越南行藁序

鎮陽智熙善子元以多學濟卓犖之才大德間宿衛春

宮冀速得行其志命與時左為南臺行人轉掾史又不  
樂棄去今太師秦王右丞相為南臺大夫知其才居中  
書擢西曹掾皇上即位故事遣使頒朔安南行者超三  
級歸不駁降故自售雜還而薦私者亦復沸騰久不決  
乃合議堂上丞相曰智子元可欲行者與智面校優劣  
衆口始塞於是子元以禮部郎中佩金符為介使以行  
既反命出紀行詩藁徵言表之禮諸侯即位小國朝之  
大國聘焉況天子即位乎諸侯之於天子比年一小聘

三年一大聘五年一朝况蠻夷小國乎安南先宋納款  
我不拒之天下既一彼復反覆我不銜之褒嘉錫賚不  
吝也然自世皇時召其主入朝而為辭幾易世矣世一  
來王且不能行而朝廷每勤行人涵容煦育祇以見我  
元之天地其量也觀子元詩其處之之道大較已見矣  
今年五月二十五日檢才大安閣下予首舉子元甚力  
丞相喜且云智子元佛法亦通宜亟用之而下坐它有  
論薦可否持久俄丞相起遂輟凡使安南即酬美官子

元獨留滯餘一年雖然丞相不忘也一旦柄用其亦自行其詩乎讀之竟序而歸之

張雄飛詩集序

延祐首科國人暨諸部列右榜者十六人幸獲魚兔委其筌蹄與夫不以一得為足汲汲所未至者亦各播人耳目有不得而揜者焉唐古氏張君雄飛首科右榜有聞者也不以一得為足益礪其學尤工於詩往往膾炙人口佳章奇句不可悉舉拜御史西臺按巴蜀越雋足

跡殆盡西南履少陵之躅默有契焉移南臺行嶺海窮  
極幽險僉浙東憲過錢塘登會稽探禹穴天台鴈蕩之  
勝舉在心目得江山之助故其詩益昌而多也矣言之  
精絕者為文文之精絕者為詩然昔人有文章妙一世  
詩句不逮古人之言亦有文章不傳獨以詩顯者工部  
三賦它無聞焉非無文也以其所長揜之也雄飛既礪  
其學而詩又其尤長者乎移僉湖南過余瑯琊山中出  
其藁古律詩共若干首属序其端愚因以得悉其多也

且作邑而有惠佐臺而有聞司憲而有為礪學又不已  
不獨資為詩將澤於道德仁義致其遠者大者其可尚  
也哉吾同年之得人可不謂盛矣乎

成中丞詩序

元統癸酉南陽成公誼叔既擢第官翰林學日益進名  
日益振仕日益顯為河間轉運使弟有孚嘗過之談其  
政不釋誦其詩又勝所聞於是知誼叔不以一第自滿  
力進脩而志遠大者也中臺政府敷歷俄徧御繁肩重



著作不輟分省於相相吾里故尤悉其政適林慮有警  
乘其未備而弭之有詩曰林慮清固已嘉其有為而詩  
不苟作也時方急賢召入尹京刃甫發劓復拜左丞出  
鎮大名尋拜御史中丞召歸皇上以群醜未殄將帥翫  
縮非聲實素孚健有力者巡行督治未易即工詔分臺  
率僚屬事賞罰興除俾專處決其任重矣客陳君彥博  
輯誼叔詩二百七十餘首請序其端卧病寒齋因得盡  
讀皆有關於世教而無苟作也詩言志爾斯行可以言

志矣昔元結作春陵行兼賊退後示官吏二首老杜謂  
今盜賊未息知民疾苦若得結輩十數公落落然叅錯  
天下為邦伯萬物吐氣天下少安可待矣不意復見比  
興體制今誼叔為宰執天下皆在鈞陶中豈特邦伯而  
已哉他日事業將百春陵見之歌頌者又將鳴邦家之  
盛不但言志而已也是為序

宋顯夫文集序

予卧病田廬有禁近之召迫命就道惶汗無措而復竊

自喜幸故人宋君顯夫實直學士協恭侍從自公論文亦一樂也比予入京而顯夫卒矣予病亟歸不得省其孤承詔復來顯夫已贈國子祭酒謚文清思而不可見惜哉孤籲奉燕石集拜且泣曰此先子所遺兄彙編次者也世父至治集公實序之敢援例以請予序誠夫文不一紀又序其弟人之生世其可悲也夫昔顯夫兄弟入京首與予同游盡眎予所著睽離有作必寄故知其長蚤且悉也及閱顯夫藁則未相識時歌詩已嘗及予

重以三十年分誼之篤序可辭乎國家設貢舉陶天下以經術餘三十年文當日益昌而名能著見者何其指之不多屈也積儲之不厚也造詣之不遠也取而隨竭發而自耗拘拘規倣而偃偃乎所適者欲昌得乎惟其有所本也有所叅也該洽沉潛心有所得濟以定力而熟之則於辭也決淵渟而灌溝澮策堅良而走康莊庶乎其達矣顯夫登甲子科考其作未有貢舉前已汨汨矣視誘利祿而重失得忽於播而急於穫者不有間乎

人知其才而不究其積儲造詣之有素也不竭不杞而  
又有進焉故予序其集而原其得俾後之觀者有激焉  
集凡若干卷文若詩樂府若干首自名燕石然世皆信  
其為玉也曠由奉禮郎為丞相東曹掾彙從父之文不  
使遺逸不愧顯夫之於誠夫矣顧甫襄事即謀刻父文  
宋之後其亦昌矣哉

文過集序

丁丑分省予以五月二日發京師八日達上京大臣日

侍帷幄時陪論奏退則入省治常事軍國機務一決於中而京師留省百事所萃必疑不決暨須上聞者始咨報故分省簿書常簡叅議左右曹非有疑稟不至都堂日長吏退恒兀兀獨坐間得閒游歌詩率爾賡和心有感觸亦形詠歌乘興有一二十首而無心營度一字亦復動涉旬日七月十七日奏歸日定有司次第治行予亦諭僮僕橐衣以俟諸生李冕掇拾繆作得百二十首予視嘆曰夫士之窮者乃工於詩予竊祿逾涯人不謂

窮也謂予不窮則昔人以道不行為窮方今玄象示儆  
獠夷弄兵浙人號饑中州告水官瘵民疲財瘁粟耗而  
予覲顏執政道果行乎悲夫予蓋窮者也窮者詩宜工  
而復不工何哉彼之窮歛其心力一寓於詩予之窮雖  
疲精竭神於所當為而識淺才劣卒不能為至於詞章  
小技亦遂俱廢彼之窮猶有詩予之窮併詩而無有而  
不工猶無也予其窮之尤者乎而不工之語時託箴諷  
滕口饒饒者又小人之文過也因題文過集以識予過

因以見小人之志又有不在於詩者焉

圭塘小藁卷五




謹案卷五第三頁後四行札瑪拉迪音舊作札瑪刺丁

今改後倣此 四頁前二行巴爾奇爾布哈舊作別兜怯

不花今改 前四行特穆爾達實舊作鐵木兜達失今

改 二十二頁後六行唐古氏舊作唐兀氏今改後倣此





總校官進士臣胡榮

校對官庶吉士臣陳墉

謄錄監生臣薛翰